

四庫全書

史部

欽定四庫全書

史部

延祐四明志卷十七

詳校官編修_臣曹振鏞

檢討_臣德生覆勘

總校官編修_臣王燕緒

校對官中書_臣陸湘

謄錄監生_臣范從理

欽定四庫全書

延祐四明志卷十七

釋道孜

禪院

阿育王山廣利寺縣東三十里晉義熙元年建梁武帝
賜阿育王額宋大中祥符元年賜名廣利大覺禪師懷
璉居之名振天下皇祐二年懷璉居東京淨因院仁宗

元
袁楠
撰

召對賜食御製釋典頌并提綱語句授之治平三年英
宗詔歸山熙寧三年建宸奎閣寺有釋迦如來真身舍
利塔內有一角金鐘舍利在焉高宗賜號曰佛頂光明
之塔嘗取至禁庭寺東北山上有所謂迦葉佛左足跡
上有東塔院傳者謂劉薩阿所禮舍利塔湧出之處西
塔院去寺五十步塔乃唐明皇時建也寺東二里有無
相庵大慧禪師作

道宣感通傳

晉大康二年并州離石人劉薩阿生業弋獵因病死而復蘇云在冥中見一梵僧語之曰汝罪深重應墮惡道今洛下齊城丹陽會稽並有古塔及浮江石像悉阿育王所造可勤求禮懺當免斯苦薩阿更生乃祝髮為僧更名惠達東詣鄒縣入烏石壘結茅呂寓徧訪海渚名山忽一夜聞土下鐘聲即標識其處越三日見梵僧七人行道空中地形如湧為方壇狀神光照映因劬土求之得一石函中有舍利寶塔六僧騰空而去一僧化為

烏石因以名壘焉

會稽記

晉相王導初渡江有道人神采不凡自言來從海上告導曰昔與阿育王同遊鄮縣安真身舍利塔阿育王與真人捧塔飛行虛空入海諸弟子攀引不及一時俱墮化為烏石如人形名僧傳云昔時神人捧塔飛行海上弟子中有未得道者墮地化為烏石猶作人形上有袈裟丈至今村名塔嶼壘名烏石今烏石在寺前數里屬

鄞縣塔嶼村相去又十五里屬定海謂東塔院為舍利湧出之處

天童山景德寺縣東六十里晉永康中僧義興誅茅結屋山間有一童子日給薪水後既有衆遂辭去曰吾太白也上帝以師篤道行遣侍左右語既不見故曰太白禪師寺經兵火唐開元二十年僧法璿復故迹建精舍於山麓之東正字萬齊融造多寶塔於西南隅後徙寺於太白峯下乾元初相國第五琦奏請天童玲瓏巖為

寺名後僧清閒建食堂咸通十年為天壽宋景德四年
賜今額紹興初宏智禪師撤而新之淳熙十六年僧懷
敞建千佛閣日本僧榮西從敞遊歸其國致百圍之木
以來寺側有虎跑泉石松夾道二十里梵宇甲東
南

虎跑泉玲瓏巖等詩並見集古攷

大慈寺縣東六十里宋嘉定十三年史丞相彌遠創立
為功德寺

大梅山護聖院縣東南七十里唐貞元中法常禪師始
誅茅結庵開成元年建寺曰上禪定會昌廢大中復建
名觀音禪院柳公權書宋大中祥符元年賜今額其山
蓋漢梅子舊隱也法常禪師偈曰摧殘枯木倚寒林幾
度逢春不變心樵客過之猶不顧郢人那得苦追尋
一池荷葉衣無盡幾樹松花食有餘剛被世人知佳處
更移茅舍入深居

大梅山保福縣南東七十里唐正元十二年建號北蘭

院大中元年改報國仙居宋大中祥符三年賜今額與護聖同一山汪大猷有記

仗錫山延勝院縣西南一百二十里唐龍紀元年天童山紀禪師飛錫至此建宋寶元二年賜今額寺前有石巖高丈餘上刻四明山心四字乃漢隸也

金峨山真相寺縣東南八十里舊號羅漢院唐大厯元年建宋治平元年賜額

金文山惠照寺縣東南七十里舊號金文懺院唐乾寧

二年建宋治平元年賜額

五峯山崇福寺縣東五十里舊五峯院晉天福六年建

宋大中祥符三年賜額

東山慧福寺縣東南四十里舊號福昌院宋淳祐七年

鄭丞相請於朝增田重建為功德寺改賜今額

跣跨山崇果寺縣東五十五里晉開運二年建宋大中

祥符三年賜今額

普淨寺縣西南七十里舊號頂峯庵宋建隆二年建大

中祥符三年賜今額

四明寺縣南二十里舊號鄞水院唐天福二年建宋大中祥符元年賜今額

白雲延祥寺縣東南八十里宋乾德五年建大中祥符三年賜額

法忍寺縣西南六十里舊號定光院唐咸通元年建宋治平二年賜額

西延壽寺縣南四十里舊號永福院唐中和六年建

翠嵒山移忠資福寺縣西南七十里舊號翠巖境明院
唐乾寧元年建宋大中祥符元年賜名寶積禪院嘉泰
四年前張參政請院為功德寺賜今額

報忠福善寺縣西南七十里舊號峒山院唐光啟二年
建宋大中祥符元年賜名彰聖本甲乙徒弟院乾道四
年改充十方禪院嘉定二年加賜前額踞峒山東南支
衆峯環合狀若芙蓉是年樓參政鑰請為功德院賜今
額

佛隴山積慶顯親寺縣東六十里唐咸通十三年建宋
治平元年賜名保安慶元六年充恭淑皇后宅齊王府
功德院

教忠報國寺大慈山丞相史彌遠功德寺

妙智寺大慈山丞相史彌遠功德院

霞嶼寺在縣東南六十里東錢湖之心小嶼兀然於其
中大資史巖之鑿山為觀音洞髣髴寶陀之山因建以奉
且割田以贍

教院

資教寺縣西四十里舊號廣德院周顯德元年建宋治平元年賜額

悟真寺縣東南五十里漢乾祐二年建宋治平元年賜今額

栖真寺縣南六十里隱學山唐建中二年建號隱學寺宋大中祥符元年賜額

惠光寺縣西南四十里唐咸通八年建名小江宋大中

祥符三年賜額院嘗有妖僧塑神像納老烏於其腹以術呪之使為禍福於人而邀利民之有災患者不禱其神則不寧乾道中守張津知之追妖僧至庭下具得奸狀遣吏剖其像果有死烏杖其僧而逐之民以安息

治平寺縣南三十里後唐清泰二年建名保豐宋治平元年賜額

廣壽寺縣東五里周廣順元年建號崇慶院宋慶厯七

年賜額

廣嚴寺在縣東四里舊號華嚴院晉開運元年建宋治平二年賜額

布金寺縣西南三十里宋寶元二年建治平二年賜額
海惠寺縣南三十里舊號廣利以院之祖師廣利大師
得名治平二年賜額

興教寺縣南五十里舊號小溪興福院唐咸通八年建
宋治平元年賜額

欽定四庫全書

延祐四明志
卷十七

普和寺縣西南五十五里漢乾祐二年建名靈影宋慶
厯七年賜額

圓通寺縣南三十五里唐天祐十年建名東林宋治平
二年賜今額

鄧橋廣福寺縣東南二十里宋天聖四年賜名壽聖紹
興三十二年改賜額

普安寺縣南五十里梁乾化二年建名茆山宋治平元
年賜額

明心寺縣南三十五里晉天福五年建名厲山院宋治平二年改賜額

惠燈寺縣東南二十五里舊號朱村院宋建隆二年建治平二年賜今額

福聖寺縣東南四十里舊號東山塔院宋乾德四年建治平元年賜額

清修寺縣西南八十里舊號清涼院宋乾德二年建大中祥符元年賜額

普照寺縣南七里舊號明福院宋乾德二年建治平二年賜今額

辨利寺宋端拱中建舊為史丞相彌遠功德寺

慈悲普濟寺東湖月波山下宋淳熙五年建

普光寺

缺

教忠報國寺宋紹興二十年建淳熙六年賜額

寶華寺大慈山前史丞相彌遠功德寺

普恩寺在縣東五十里皇慶二年儒人陳泳施財創建

復割田以贍其子廷藻於延祐元年申告有司達於帥府請今額

律院

寶巖寺縣西南五十里舊號孝義院唐元和十二年建宋大中祥符六年賜額王荊公有詩

廣修寺縣東六十五里晉天福五年建宋大中祥符元年賜額

普提廣福寺縣東南八十五里唐乾符六年建宋大中

祥符三年賜額

禪巖寺縣西南八十里唐貞元元年建寺東有巖穴可坐百餘人舊有僧言法師修道之處因巖名寺曰禪巖今為律院

慈雲寺縣南三十里漢乾祐二年建名李浦宋治平二年賜額

法雲寺縣東七里宋乾德六年建號甬東浴院治平二年賜額

多福寺縣東五里宋乾德三年建治平元年賜額

悟空寺縣東南六十里大慈山前史丞相彌遠功德寺

甲乙院

栖心崇壽寺縣東五里舊號東津禪院唐大中十二年
分寧令任景求捨宅建請心鏡大師居之僧姓朱既居
於此會剋寇裘甫轉掠四明有衆數萬縱兵入寺師燕
坐禪定神色不動賊衆愕然悔過作禮倒戈而退咸通
二年寇平郡奏其事請以栖心名寺旌師之德宰相裴

休為之書扁七年師化謂其弟子曰後三年當焚我窆
於天童山忽一日有異香發聞弟子相謂曰師有遺言
今三載矣異香其啓我乎乃發龕茶毗之儼然如生獲
舍利數千顆丹翠交輝敕謚心鏡塔名壽相天童亦有
舍利塔焉刺史崔琪狀其行於碑宋大中祥符元年賜
額政和八年四月七日御筆以有常住莊產寺院改建
神霄玉清萬壽宮州以寺充焉久之復舊

唐心鏡大師碑

崔琪

釋氏之宗也得了悟真機則曠劫不礙自釋迦去世至曹溪以降指心傳心祖系綿續下分萬派不墜本枝故得之者則迴超覺路坐越三界大師之道契萬派之一流也大師諱藏真俗姓朱氏蘇州華亭人也母方娠及誕常聞異香則知兜率降祥來從百億劫幼懷貞懃長契玄奧松風水月未足比其清華仙露明珠詎能方其朗潤故以智通無累神測未形越六塵而迴出隻千古而無對為兒時常墮井有神人接持而出卅歲出家師

事道曠禪師弱冠詣中嶽受具戒母念其遠思之輒泣因一目不視及歸省母即日而明母喪哀毀廬墓徵瑞備顯由是名聲翕然歸敬者衆因欲絕茅誅木與禦燥濕遽感財施充積堂廡乃崇院側有湖湖有妖神漁人禱之必豐其獲罾罟交翳腥羶四起大師詣其祠而戒之鱗介遂絕後挈瓶屨以歷湖山靈境異迹遊覽將畢復詣五洩山遇虛默大師一言辯析百契符會噫顯晦之道日月之所照也聖教其能脫諸故會昌大中衰而

復盛唯大師居之瑩不能感所謂焚之不熱溺之不濡者也洎周洛再構長壽寺敕度大師居焉時內典焚毀梵筴煨燼手緝散落實為大藏故南海節度楊公典姑蘇日請大師歸於故林以建精舍大中十二年分寧宰任景求舍宅為禪院迎大師居之剡寇裘甫率徒二千執兵晝入大師冥心晏坐神色無撓盜衆皆悸懼叩禮逡巡而退寇平郡中奏請改禪院為栖心寺呂旌大師之德凡一動止禪者畢集環堂擁榻堵立雲會大師學

識泉湧指鑒岐分詰難排疑之衆攻堅索隱之士皆立
寧苦霧坐泮堅冰一言入神永破沈惑呂咸通七年秋
八月三日現疾告終享年七十七僧臘五十七先是命
香水剃髮謂弟子曰吾七日在矣及期而滅門人童弟
號躄泣血乃窆於天童巖弟子培墳藝樹三載不間忽
一日異香凝空遠近郁烈弟子相謂曰昔奉大師遺囑
令三載之後當焚我身今三載矣異香具啓我心乎乃定
厥議揭龕發塔再睹靈相儼若平生以其年八月三日

禮法茶毗於天童巖下祥風瑞雲竟日隱現獲舍利數
千顆紅翠交輝白光上貫十三年弟子戒休齋舍利述
行狀詣闕請諡奉勅褒誄諡曰心鏡塔曰壽相嗚呼菩
薩之變通也出顯入幽示現無極其可究乎大師自童
孺距耆耄陳言措行皆貽感應復以證前生行業知示
滅之日時苟非位躋十地根超上品孰能造於是乎在
長壽寺時謂衆僧曰昔四明天童山僧曇粹乃吾之前
生有墳塔存焉相去遼遠人有疑者及追驗事實皆如

其言景求將遇大師也人或難之對曰治宅之始有異僧令大其門二十年之後當有聖者居之比大師至止二十一年矣初大師將離姑蘇為徒衆留擁乃以授拂與之曰吾弗在此矣爾何疑焉及大師潛行衆方諭其深意又令寺之西北隅可為五百墩以鎮之衆曰力何可及大師曰不然作一墩種柏五株即五百墩也凡微言奧旨皆此類也至若闢玄關諭生死弘敷至蹟不備論咸通十五年琪祇命四明郡戒休呂其跡徵余之文

遂直書其事以旌厥德銘曰空王設喻煩惱無涯唯大
師心照盡塵沙大師降靈吳之華亭方娠載誕厥聞惟
馨童蒙墮井神扶呂寧母思眇目歸省而明漁人禱神
其獲豐盈一戒祠宇施眾莫嬰像教中虧貝葉斯墮手
集三乘遺文可披識羊祜環知仲尼命正色兵威寄詞
譚柄我来作牧空企音塵琢茲貞石庶乎不泯

景德寺縣西三十里宋寶祐元年間建

延福寺縣東南二十里唐大中十三年建名天王宋治

平元年賜前額院有天王像

資聖寺縣東北一里半舊號漁浦門外院宋太平興國二年建天禧四年賜額

寶林寺縣南三十五里舊號報國西林院晉開運三年建宋治平元年賜額

延壽廣福寺甲乙教院縣東南六十里舊號延壽王院
晉天福二年建宋熙寧元年增壽聖二字紹興三十二年改額

禪寂寺縣東南三十五里宋雍熙二年建治平元年賜額

尊教寺縣東南四十里晉天福三年建名惠日宋治平元年賜額

能仁寺縣西南十里宋乾德中建號東安宋咸平六年改承天院政和七年五月改前額俗呼南承天

聖壽寺縣西南六十里唐咸通五年建宋太平興國三年賜額

法慈寺縣西南七十里舊號鳳山院唐咸通七年建宋
治平三年賜額

崇法寺縣南五里舊號焚化院宋乾德五年建大中祥
符三年賜額有鄞女墓

大悲寺縣東十五里舊為金蓮庵上橋林氏所建宋紹
興年間改庵為大悲寺

天壽寺縣西南六十里舊號天井院宋建隆元年建治
平元年改賜額按周鉢天壽院記云四明山西南諸峯

惟灌頂定光為最高旁有瀑布瀉於兩山萬疊之間其
下有三井泓然澄深清澈見底是為天井歲旱禱於井
隨求而應有金線蜥蜴之狀出而赴感興雲雷沛甘澤
為一方千里之惠而年穀用登初僧有道凝者來自福
堂建室百楹於井上鄉人遂以天壽名之丐於朝而得
賜額焉

青山惠安寺縣東四十里晉天福三年建宋大中祥符
三年賜額天祐元年中元日有十六僧現於山頂逡巡

而滅又名其寺曰羅漢院

普寧寺縣西南五十里舊號天王院唐咸通十三年建
宋大中祥符三年賜額

空相寺縣西南七十里舊號四明保安院晉開運二年
建宋治平二年賜額

方廣寺縣西南五十里舊號泗洲院唐咸通十一年建
宋治平二年賜額

國寧寺縣西十五里宋大觀二年建賜額

妙智寺縣西南七十里舊號觀音庵漢乾祐二年建宋治平元年賜額

慈福寺縣東三十里舊號盛店保安院周顯德二年建宋治平元年賜額院舊有禪師者年六十餘日誦妙法蓮華經三十餘年如一日以部計之萬五千矣世目之為金法華淨照禪師臻老既詩之士大夫從而和之甚衆最後黃山谷一詩云攝意持經盡劫灰人間處處妙蓮開他時誦滿三萬部却覓曹溪一句來

慈恩寺縣西南九十里舊號小溪松巖院晉天福九年

建宋治平二年額賜

明覺寺縣東六十里舊號明堂院唐寶曆二年建宋治
平元年賜額寺有在在堂前直龍圖閣舒亶記併有詩
十二絕

不管霜毛不貸人一年舊了一年新山窓未曉聞山樂
可是梅花漏泄春

風吹雨脚細於絲冷暖渾如寒食時不待千山消盡雪

小紅已到杏花枝

沙溪過雨半清渾
徑石高低帶雪痕
又見山農話春事
腰鎌兩兩喚兒孫

斷橋高下路橫斜
隔水人烟四五家
雨後一枝紅帶雪
風流不道有巖花

一溪高自撲巖來
寺在巖腰水抱回
林下老僧相顧笑
柴門今始為君開

高低深淺逐陰晴
一簇林巒畫不成
誰道青山怕雲點

白雲點處轉分明

四山面面玉成圍只許閒雲去又歸更有小軒人不到
落花狼籍點苔衣

只見青山無水聲到頭耳目未全清年來賞遍江東寺
纔入今宵睡未成

六國干戈擅霸圖先生談笑有工夫不知當日縱橫夢
曾識水聲山色無

榛棘叢中舊草堂千年誰復辨興亡累累付與張儀印

珍重空中一炷香

枉將風月惱肝脾
懶復雕鐫出小詩
盡日焚香面山坐
捲簾時與夜僧棋

小白山前大白山
兩山強坐屬僧閒
何時卜築三椽地
黃帽青鞋日往還

普光寺縣東四十五里
舊號光化院
晉開運二年建
宋治平元年賜額

淨衆寺縣東二十里
舊號齋堂院
宋開寶二年建
治平

二年改賜額

珠山淨土寺縣東六十里晉天福元年建號珠山院宋

治平元年賜額

阮山廣福寺縣東九十里漢乾祐二年建號阮庵宋熙

寧二年賜壽聖院額紹興三十二年改前額

多寶寺縣東南八十里舊號管江院宋開寶元年建治

平二年改賜額僧則為慈溪方氏子也始生遇相者曰

此兒出家則成道長入多寶院師若旻大智照公照公

講於錢塘祥符東院師與其徒六人服勤左右學益通
號六羅漢凡有資承大智可之遂傳其要歸住多寶訓
講如大智告學者戒以不犯為本律以持守為功念念
常存淨度立至忠肅陳公瓘與相好超然心契晚辟穀
不食趺坐而逝天大暑數日不掩龕色不變也建塔院
之西山前敷文閣待制龍舒朱翌為銘

法度寺縣東南八十里舊號寶慶院唐乾寧元年建宋
大中祥符元年賜額

雲龍寺縣東南二十五里

資福寺縣西南六十里唐光啓二年僧志回建光化四年賜名廣學同光四年改名隱學宋大中祥符元年改名資壽咸平三年賜額為前宣參政繒功德寺

記政
媿作

保安寺 缺

雷峯傳善寺宋參政宣繒功德寺

勝像寺宋史越王功德寺

大中祥符寺縣東五十里晉天福三年建名西溪宋治

平三年賜名法寶嘉定中尚書史彌堅請為功德寺十七年改額

天福寺縣西南八十里宋治平中建

寶壽寺縣南五十五里初為華藥嵒龍湫庵宋淳熙間僧明哲所創景定三年移請杭州長生橋東廢寺寶壽院額歸寺

廣恩崇福寺袁越公韶為其父衛公建王尚書有記

剡河以東山水名天下四明為最出四明西門至林村

行六七里曰桃源循源而入虬騰駟奔氣勢奇峭紫巖
為最溪清谷窈楸櫟鬱茂是為太師袁衛公之阡公篤
厚好善用昌大厥家嗣子尹神京貳樞庭相攸紫巖之
陽俶建梵宇適承先志奉大士像而法華手澤藏焉請
於朝賜名廣恩崇福秀堅瓊觀甲於諸方奧殿穹堂儼
然寶地林霏巒翠獻狀几席松風澗泉與鐘魚相答泐
基鳩役匠成於心則住持僧可仁也輪奐之媿田疇之
闢仁皆躬服其勞雅人勝士來遊而嘉嘆之惟古者體

貌大臣推本德善之積廟祀其祖禰施於烝彝鼎近世
又卽緇廬寓蓼莪寒泉之思於是錫命以寵靈之蓋君
子謹終追遠無不用其極而遇大臣之禮亦至矣哉夫
秉彝好德人之良心釋氏以空寂為教若外乎倫紀然
其書有大報恩篇言孝與儒合是故致嚴致懋而宮室
之以薦苾芬於九原禮可以義起也觀於斯者愛敬之
心油然而生矣余謂善必有慶如殖斯穫非以徼福也教
子以食其報可謂使為善者勸一宜書仰飛雲而俯拱木

著存不忘於以詔萬子孫勿替引之二宜書披壞壤經
營用力勤刻意專南豐所為稱學佛者將以勉吾儒也
三宜書寺經始於紹定庚寅之孟秋越淳祐乙巳季夏
致成是歲之秋可仁請識歲月詔永久遂書其事於石
郡人王應麟記

崇報寺縣東五十里宋提刑史彌正建

城東化城院縣東十五里宋時有吳僧德安攜道錫自固
二道侶禮阿育王塔至此地訝其孤迥遂剏數椽為緇

徒憩止之處寶祐元年圯於風過者嗟嘆時安與錫皆亡矣惟自固存焉固欲復舊圖而未遂郡人呂為道瑾相望義聚遺骸從浮屠法作佛事而悼之固尸厥事事已有餘貲衆為固鬻牒了身事固乃以所得牒集衆財悉以興土木緝成舊緒築海塗為良田名曰化城院後衆為固祝髮白郡就正主席

天壽保國接待院在縣東二十里皇朝至元二十三年僧大達建元貞二年總統所立前額

慈濟寺縣東三里皇朝大德八年楊秀建至大二年頒降
聖旨護持賜額

二靈寺縣東六十里宣和間陳正言捨山以建號曰金
欄

福林寺縣東南六十里至元三十年僧圓珏建聞於有
司議額

壽國寧親寺 缺

靈濟寺在縣東二里嘉定十二年史衛王建俗呼靈濟

庵至元十六年火重建

翠嵒山寶積寺縣西南七十里宋乾道三年賜額

天壽重興寺縣西南五十里至元二十一年僧永明與
徒弟惠涓一靖買厲民庵改建

海會庵在縣西二里許首僧妙壽俗姓楊鄆中儒流也
延祐甲寅與其徒募緣得地十餘畝築屋二十餘楹乞
食自活以接四方因名海會禪庵

尼寺

廣智院縣東五里大德十年建

雲居寺縣西二里至元十七年淨心建徒弟起宗自安等甲乙住持

奉化州

雪竇山資聖禪寺州西北五十里舊名瀑布寺唐光啓中置咸通八年重建改名瀑布觀音禪院宋咸平三年請今額至元戊子燬住持僧善來重建初宋仁宗夢二龍爭珠遍下名山圖寫山形進奏寺前兩澗合流中有

木林護珠遂號應夢道場南有隱潭東有石蒼潭前有
含珠林千丈巖瀑布有亭三曰飛雪曰妙峯曰漱玉呂
夏卿資聖寺明覺大師碑云夫真空不空是有無證
寂滅不滅是往來相佛以權實之法開頓漸之徑
使隨器而趨之有不離道場得大智慧有難行苦
行為人天業日月為明矣而盲者不見睫毛舟楫
可濟矣而溺者淪於波浪人之未有惡萌而忘濟
者其心一也其塗異矣昆蚊之性羣行食啄倦則息

觸則避求所以安樂不待教而能也人之於貴賤貧富
壽夭得喪不知自然之分愛惡悲欣廉貪靜躁糾纏桎
梏無所解脫晝勞形骸夜勤夢寐至於老死且不知息
彼昆蚊知所以安樂人顧不能也佛之教人推性命之
際以極天地之外乃至觀身如掌中物傳付法寶不寓
文字是謂禪那山岳之大有時而泐金石之剛有時而
剝形器之用也我則異於是無去無住無聚無離不見
於內不見於外不見中間自利義也利他仁也是為涅

槃妙心諸佛法印無上微妙祕密圓明真實正法眼藏
佛以授摩訶迦葉傳僧伽黎衣呂待補處出世為成道
之符自是衣法相傳二十有七世香至王子初入中國
諡曰圓覺圓覺傳大祖大祖傳鑑智鑑智傳大醫大醫
傳大滿大滿傳大鑒大鑒藏衣傳法而已大慧繼之大
寂承之其後皆以所居稱若天皇龍潭德山雪峯雲門
香林智門此其世次也禪師諱重顯字隱之大寂九世
之孫智門之法嗣也俗姓李氏母文氏呂太平興國五

年四月八日生大師於遂州始生瞑目若寐三日既浴乃豁然而寤屏去葷血不習戲弄七歲有僧過其門挽持袈裟喜不自勝聞梵唄之聲輒泣下父母問其故懇請出家父母執不可師不食者累日咸平中終父母喪詣益州普安院仁銑師落髮為弟子大慈寺僧元瑩講定慧圓覺疏師執卷質問大義至心本是佛由念起而漂沈伺夜入室請益往復數四瑩不能屈乃拱手稱謝曰子非滯教者吾聞南方有得諸佛清淨法眼者子其

從之待子之來也久矣師於是東出襄陽至石門聽禪師之席居三歲機緣不諧聰諭之曰此事非思量分別所解隨州智門祚禪師子之師也師乃徒錫而詣之一夕問祚曰古人不起一念云何有過祚招師前席師攝衣趨進祚以拂子擊之師未曉其旨祚曰解麼師擬答次祚又擊之師繇是頓悟尋往廬山承天林禪師道場問之曰法爾不爾云何指南林曰只為法爾不爾師遂拂衣而退衆皆股慄有毀於林者林諭衆曰此如來廣

大三昧也非汝等輩以取舍心可了別也師辭往池州
景德寺為首座為衆解肇法師般若論知州曾公至以
果子抵於地曰古人云不離當處常湛然即今在何許
師指景德長老曰凡此長老亦不知落處曾公云上座
知也不得無過師曰明眼人難瞞師南遊杭州住持蘇
州洞庭翠峯嗣智門也未幾曾公出守明州手疏請師住
持雪竇資聖蘇人固留不可師曰出家人止如孤鶴翹
松去若片雲過頂何彼此之有雪竇本智覺禪師之道

場智覺亦雪峯五世孫備傳琛琛傳益益傳韶而壽維
之智覺其號也一法同源而地有盈虛師之至猶家焉
決潢沲變清泚掖蹕偃爭迅馳州邦遠近輻湊下坐駙
馬都尉和文李公表錫紫方袍侍中賈公又奏加明覺
之號住持三十一載度僧七十八人先是門弟子建壽
塔於寺之西南五百餘步一日命侍者洒掃塔陳亭行
至山椒歷覽久之曰自今過此何日復至左右皆大驚
衆迎師還師亟詣塔所衆皆號泣隨至塔前或曰師獨

無頌辭世邪師曰吾平生患語之多矣翌日出杖屨衣
孟散遺其徒有問疾者留食殷勤與之約曰七月七日
復來相見是夜盥浴整衣側卧而滅時皇祐四年六月
十日俗壽七十三僧臘五十夏以七月初六日入塔如
師之約嗚呼師得妙用善機不取諸法故能知去來達
性命故方是時升堂皇游牆藩者悟性相體空頓息萬
緣為大乘法器曰義懷在和凡百五十人傳其法於天
下彼遮護意根網絆初心背覺合塵逐念流徙得少為

多妄立知見雖三詣投子尤陟洞山師亦援手濡足而無以救之是猶孔子之有宰我孟子之有盆城括非其師之過也自師出世門人惟盖文軫圓應文政遠塵允誠子環相與哀記提唱語句詩頌為洞庭語錄雪竇開堂錄瀑泉集子英集頌古集拈古集雪竇後錄凡七集師患語之多而其徒悵然猶以為編擗有遺盖利他之謂也予得其書而讀之二十餘年矣雖瞻仰高山而祿利所縻無由親近使得稽前首避席霑被法雨覺寤塵

勞庶幾可教者今蔑如之何師辭世十有三年碑表未立餘杭僧惠思撰行業錄與其徒元圭覺濟大師悟明繼踵過門哀文請銘以予跂慕之心重之以門人之請之勤抑有待耶愚公叩壤以移山雖不量力其誠則至矣謹焚香再拜繫之銘曰噫蠢愚皆本源一念異生二根勝與劣駟馬奔嗜所得自詐謾失大道南北轅艾至老踰朝昏正遍覺天人尊迷者挽溺者掀朝暎出慧霾雲渴得漿寒得薪悟報化知非真趣安穩擺客塵王叔

生廣佛事破六宗應彈指法來東非會際信衣傳隻履
逝頂五山真法器立積雪殊其臂忍非忍得法髓債必
償有裔嗣皖公潛佛日翳翮南游立如榴乞解脫彊哉
慧攘蜂蠆神兵衛破頭峯衆雲從橫六氣醺二宗教任
意付懶融黃梅兒陌上童闕七相了諸空聖服勞杵曰
傭和心偈掎爭鋒夜南驚懷是逢帝稽首睇下風舟復
新葉歸叢有道得無心通世有承四衆依燈相續懃應
虎師異稟自孩提升腴雋蹈聖梯慈固拒不得施起恭

孝終直線銑落髮瑩質疑漢之東得我師扶盲瞶柞荒
苗昔無有今委蛇遇霑洽發萌莠淫鼃鳴鐘未蘆魚目
藏明珠吐歸二山下儋負來萬里足繭踣旬春雷披蝥
戶辨縛解決去住沃醍醐斟甘露百五十胄蕃舞窮車
轍誦句語瞻骨目軸繪素遠胡越近杖屨捐簏相悉開
悟山芾鬱泉呬幽虎跡交鼯猱啾塔門閼柏松膠天南
垂海彪彪囊破褐笈單裯來環繞五體投名韁身祿飽
喉狙怨憎甘鮑鱗睨真乘等贅疣慶我生辨薰蕕斬誘

掖邈無由琢堅石攄我憂方干題云登寺尋盤道人烟
遠更微石窓秋見海山霧暮侵衣衆木隨僧老高泉盡
日飛誰能厭軒冕來此便忘機曾少卿題飛雪亭云玉
虬垂處雪花翻四序雷聲六月寒憑檻未窮千丈勢請
君巖下舉頭看樓攻媿和云驚見銀河空外翻湍飛千
丈有餘寒下流不用長勞望祇向銀河頂上看又高元
之題云危亭上拂烟霧光蒼崖深到蛟螭穴天河飛來
破山翠寒入疎林風自發翻珠錯玉無時歇巖前散作

千秋雪寒聲蕭蕭凜毛髮白雲朶朶翔空滅飛流濺沫
入毫端天與一詩為題絕樓攻媿題錦鏡橋亭云兩溪
赴壑若奔虬此地端能截衆流三板放開千丈雪一奩
照破四山秋幾年空自存公案今日重新指路頭珍重
老師成勝事清名當與此山留又題妙高峯云一峯高
出白雲端俯瞰天涯千萬山試向岡頭轉園石不知何
日到人間四明僧希顏題云鴛鴦池塘芳草雨綺羅簾
幙杏花風何如月在闌干夜長嘯一聲千嶂中又鄭丞

相清之題云陸地芳洲擁翠翹巨靈穿石袞雲濤搏空
蒼鳳欲飛舞奔海玉龍爭怒號萬象橫陳坤軸富一亭
平挹月輪高獨醒未覺孤清景笑酌寒泉讀楚騷玫瑰
題千丈巖云園嶠移來東海東梵王宮在最高峯試將
法雨周沙界千丈巖頭掛玉龍又淮甸僧元肇題云上
盡崎嶇脚力微毳袍零碎染烟霏妙高峯頂見日出千
丈巖頭看雪飛寒木著霜山衣錦清泉得月鏡交輝翩
然又作東南去肯落台溫第二機

岳林禪寺州東北五里舊名崇福初梁大同間聰禪師
建小庵曰長汀後有童氏捨基建寺唐開元中賜額曰
岳林宋大中祥符間重賜曰大中崇福乃彌勒示現之
處哲宗追謚定應大師彌勒有頌云即箇心心是佛十
方世界最靈物縱橫妙用可憐生一切不知心真實
萬法何殊物何異何勞更用尋經義心王本自絕多知
智者只明無學地是非憎愛世偏多仔細思量奈我
何寬著肚皮須忍辱豁開心地暗消磨若逢知己須依

分縱遇冤家也用和若能知此心頭事自然證得六波
羅我有一布袋虛空無罣礙展開遍十方八時觀自在
又偈曰彌勒真彌勒化身千百億時時示時人時人自
不識舒亶詩云休話人間我獨尊何妨屢肆且隨羣乞
錢往往多空手問路時時向白雲壁上形容圖尚在囊
中氣味許誰分分明提起無人問欲會應須眼裏聞寺
有古瓷淨瓶六環錫杖在焉世傳彌勒遺物云

詳見高僧傳

鄞城山廣福教院州東五十里唐景福初亮法師建吳

越錢氏給額曰鄞城宋治平初改壽聖紹興間改今額
東山瑞相教院州東南二十里唐大中年間置舊名雲
峯宋治平初賜今額

南山瑞峯律院州東南一十里唐咸通中置名吳峰宋
治平初賜今額寺有廣莫軒攻媿題詩云廣莫乘風隘
九州亂山無數點平疇一千里外在吾目三十年來無
此游地下天高俱歷歷鳶飛魚躍兩悠悠昌黎費盡南
山句曠望還能似此不

西山資國禪寺州西南五里舊名護國唐元和間創宋
治平初賜今額唐左拾遺弘文館學士虞世美為記有
洗鉢池羅漢跡駐錫峯應供泉乃天台第四尊者成道
之地上有樂亭至和中縣令郊修輔為記攻媿題詩云
野溪清淺度危橋徑策枯筇上紫霄曉霧暗蒸山寺雨
松風深隱海門潮浮杯水漲人何在洗鉢池清意已消
又上樂亭臺上看雲山萬疊更逍遙

北山廣化律院州西北三里唐大中初置名正化宋治

平初賜今額

告成教院州東半里後周開寶中置舊名光教即樓評
事宅基宋大中祥符改今額至元間燬重建未完

演教教院州西一十里後唐清泰初祖師蘊思大師建
舊名鹿苑宋治平初改今額

淨慧院州東北四里周顯德中祖師璉建宋天聖中賜
今額即孫拾遺邵之故基宋江夏郡王趙仲爰撰蘊絨
大師塔銘襄陽米芾書至元間燬重建未完

慈氏教院州南三里唐文德初朱會等建名清化天祐
初改名寶化宋治平初改今額寺有杜鵑花蟠屈如凰
主簿樊圃詠云山僧取巧蟠珍叢九苞占盡千葩紅倚
闌精彩欲飛動百鳥不敢啼春風又有古松如卧龍
然

明化教院州東一十里舊名建城唐寶厯初創光化中
改名建寧梁開成中改名善因宋祥符初改今額

普慧教寺州東北舊為尼院名永平唐咸通十年建十

三年改今額

淨名院州東北一十里梁乾化初璉法師建舊名安寧

宋治平初改今額

淨慈禪院州西五十五里唐乾符中創舊名仁王宋治

平初改今額沈端憲公煥有記

法海教院州東南十里晉天福初創名龍潭宋治平初

改今額院下有潭廣數畝父老相傳有白龍宅其中禱

雨輒應

興聖教寺州東南五十里唐咸通十年建宋治平初賜額至元間燬重建未完

安巖法華禪寺州南五十里舊名四明院漢乾祐中置宋天聖中居照禪師遷入山數里慶厯中改今額至元間燬重建未完

清涼禪寺州東九十里朱梁龍平初茅將軍捨宅為之吳越王錢氏給額曰歸順宋治平初改今額

靈隱禪寺州西南七十里舊名國寧唐天祐初置後梁

乾化初刺史黃顥重建改靜泰宋治平初改今額

解空律院州東八十里唐長興初置名泰靖總持院宋治平初改今額寶祐初改名演忠賜福

護國禪院州西南一十五里唐中和間建舊名天王宋治平初改今額宣德郎大理評事關杞有記

西峰圓覺禪院州西南七十里舊名西峯唐咸通間置宋嘉祐間真禪師重建治平初改今額宏智正覺禪師題詩云水流百折山蒼蒼古寺形容橫野航明月初

濡寒露白籬花似趁重陽黃道人心已老松石學
子瞻須磨雪霜默默澄源坐兀兀游魚沙鳥靜相
忘

九峯靈鷲禪院州東六十里宋開寶中置舊名明霸治
平初改今額

棲真禪寺州東七十里晉天福中置又名棲鳳

興化禪院州東七十里唐長興初置名墅市宋治平初
賜今額

清福禪寺州東七十里晉天福中置名太清宋治平初改今額

離相禪院州東九十里唐乾符初置名福慶宋治平初又改今額

資福教院州西三十里舊名法唐咸通八年建宋大中祥符八年改今額

上雪竇山奉慈禪院州西六十里唐咸通間僧明簡等建名奉國宋治平初改今額舒中丞亶詩云白雲堆裏

笑呵呵上接天衢不較多翠鎮亭臺山月冷香風
吹滅盡莎蘿陳推官舜俞詩云一宿禪關萬里空
明朝更上十餘峯山應碧落不多遠人在白雲無
數重木末疎鍾驚虎兇門前流水穴蛟龍勞生正
負林泉約猶喜官閒此處逢張漢卿題云超超巔
外雪雲明曾憶塵中見偉人沙上豈無新到雁附
來莫厭尺書頻又如知縣修輔題隱潭詩云在昔
知何人鑿破青山骨飛泉直下來千尺瀉倏忽兩

壁蒼翠間一陣風雷突旁無塵埃蹤中有蛟龍窟
寒氣不可向猛勢豈能屈安得當年為霖濟羣
物

安隱禪院州西一百里舊名聖壽唐咸通中置宋治平
中改今額

證道禪院州西七十里舊名靈橋唐光啟初置宋治平
初改今額西登山半里有龍湫南百步有深穴曰風谷
谷下有泉曰冰鑑路轉縈紆有地方丈可憩息曰振衣

巖有數步列嶂如屏曰宜晚漸入平曠有堂曰蘊秀端
憲沈公煥為撫少陵剡溪蘊秀異之句名之又築清心
亭于冰鑑之左臨淵疊磯垂釣榜曰桐廬古意渭水遺
風云

法喜禪院州西四十五里舊名永泰唐咸通年間建宋
治平初改今額

無為禪院州東一百里唐開元初建名松嶼宋治平初
改今額

顯親崇福禪院州西三十里舊名上山唐光啟初置
宋治平初改為常樂乾道初魏丞相請為香火院改
今額舒中丞題二絕云一峯旁倚兩山朝雲裏龍孫
響珮瑤長與幽人發高興不辭雨雪過溪橋龕燈隱
隱夜初分落果猿啼枕上聞客夢欲成成不得一窗
殘月半牀雲

移孝報忠禪院州西北二十里宋紹興十年建係王參
政功德院紹興間賜今額

禪悅教院州缺二十里宋開寶中置名保安治平間改今額至元間重建

寶林教院州北三十里舊名棲林唐乾寧初建宋治平初改今額至元間燬後重建

永固教院州西五十里舊名三石唐光啓初王仁紹建靈石山庵宋咸平賜今額

金地教院州西南三十里舊名福慶唐大中初置宋治平初改今額

福聖教院州東三十里舊名龍光唐咸通間建宋治平

初賜今額

清蓮教院州西南五十里舊名靈峯唐清泰初置宋治

平初改額

登岱教院州西三十里唐咸通中玄隱法師建宋治平

初改今額

普明教院州南一十五里舊名觀音唐大初置宋治

平初賜今額

福海教院州東五十里唐咸通中置舊名興福宋治平
初改今額

上乘教院州西五十里唐咸通中置舊名乾符宋治平
年間改今額

法昌教院州北二十五里舊名石芝宋開寶初置治平
初改今額

宣密教院州東九十里晉開運初置舊名桐照宋治平
初改今額

慧日教院州西二十里舊名慈林晉天福中希育主山
建草庵後廣為寺宋治平初賜今額理宗御書慈林山
三字

常浦教院州北四十里宋紹興間置至元間燬重建未
完

安住教院州南四十里後唐清泰間置宋治平初改今
額

勝國院州西一十五里宋寶祐間侍郎趙汝楨建大博

陳著題詩云轉路便幽深曾來不用尋寺依山石脚僧
識老巖心是處鬼無墓此山松自林滔滔未涯事分付
一蟬吟

藥師崇福廣恩寺州西二十里宋嘉定間執政趙觀文
善湘因在城藥師廢寺額創建

淨明教院州北二十里唐龍紀初置舊名唐灣宋大中
祥符初改今額

大雲律寺州東三十里唐咸通初置舊名石佛宋治平

初改今額

垂鴻律院州北二十里梁大同初置名晏坐宋大中祥符初改今額

仁濟律院州南一十五里舊名寶國院宋開寶三年建
淳熙間參政樓公請今額

廣福教院州南五十里晉開運初置名雲蓋宋熙寧中
賜額壽聖紹興間改今額

大同山報慈光巖禪院州西北二十里唐文德初置舊

名大同山龍池宋治平初改今額嘉熙二年宋理宗書
大同山以賜參政余天錫遂重建而廣之

崇勝院州南五十里舊名固海唐天成中置宋治平初
賜今額

悟空院州南六十里唐大中七年置名安海宋治平初
改今額

禪寂院州南四十里舊名登山周廣順初置宋治平初
改今額

廣法院州西七十里宋開寶中主僧洪固勅太平興國中以西南有巨石穹背引首因命額曰靈龜治平初改今額曰寧海湖南雷處士題云古寺在溪邊到今三百年斷崖寒雨雪怪木老風烟龜化灘頭石龍分洞尾泉重游到山外平楚更蒼然任先生題石龜鑑池誰將大鑪鞴鑄出古青銅金鵲窺寒泚文鸞下碧空永垂千古照不受一塵蒙人自分妍醜花無兩樣

紅

大智院州西七十里唐咸通中建宋大中祥符初改今額

定明院州西南六十里唐大中二年置舊名鎮國宋治平初改今額

龍華院州西八十里唐咸通中置舊名凝光宋治平初改今額

慈覺院州北二十里晉天福中僧紹回剏舊名興福宋治平初改今額至元間燬重建未完

淨業寺州東北一十五里梁貞明中祖師玄綽建塔品
院宋治平初改今額至元間燬後重建

護教禪院州西北二十里唐乾道中置舊名湖山宋治
平初改今額進士周山有記

惠照教院州西北二十里唐咸通中建舊名銅山宋治
平初改今額

尊勝院州南六十里唐光啟初置名延恩宋治平
初改今額閬風劉伋題詠云海角尋春雪未消馬

蹄無處避瓊瑤已公屋下論文酒爐火篝燈伴寂寥

廣教教院州東二十里唐咸通中置舊名靈蹟宋治平初改今額

廣濟院州北二十五里宋建隆初置大中祥符初改今額至元間燬重建未完

報國律院州南二十里晉天福初置宋治平初賜額法華接待寺州西一十五里宋淳祐間森岡二講師始

建接待庵大德八年改今額剡源戴表元為之記又題
朝暉軒云金雞警神關燭龍轉崖車陰濛欲銷散巖谷
開噓呀忽然蒼蘿崩湧出紅蓮花天暉所照鑠六合無
藏遮而我靈臺中善苗如萌芽珍重慎消息外物如塵
沙

天壽報本禪寺州西五十里大德年間僧正思創

延祐四明志卷十七

欽定四庫全書

史部

延祐四明志卷十八

詳校官編修

臣

曹振鏞

檢討

臣

德生覆勘

總校官編修

臣

王燕緒

校對官中書

臣

陸澗

謄錄監生

臣

范從理

欽定四庫全書

延祐四明志卷十八

釋道攷

定海縣

元 袁楠 撰

總持律寺縣東北一里唐咸通初慧鑑大師卽乾寧中
賜額曰護境宋大中祥符初改今額建炎燬後重建
觀音教寺縣東北一里宋皇祐初僧戒修卽紹興中賜額

妙音教寺縣西二里宋元豐中僧普照置建炎初賜額
能仁教寺縣西北四里宋紹興間僧中卞建名利濟政
和中賜今額

慈化院在縣西北二里宋淳熙中僧圓證置

顯孝接待院縣西五里宋元豐中僧一靜置名崇先淳
熙間請今額

瑞巖禪寺縣東南九十里唐會昌中郡守黃公晟為普
化禪師剏立精舍景福初改為寺宋治平初賜額名開

善祥符中因產靈芝名瑞巖山有十二峯峯下有閣
知郡李公撫辰題云高閣玲瓏倚半空秋來靜掃白
雲蹤無人寫此天然景十二闌干十二峯龍圖舒
公賁來初草堂為遊息之地詩云十二峯頭月未
央天風吹下紫芝香我來分得僧清致布衲蒲團
一草堂鄞江先生周公諤詩云紫芝巖下斲懸崖
簾捲西風一梵齋流水聲中鳴好鳥寒松影裏踏
青鞋裴公綠野雲連墅白傅香山月滿懷珍重社

蓮風味在短藜長許野人偕

華巖禪寺縣南四十里唐廣明中知禪師置名雲巖宋
大中祥符初賜額名旌教景定初改今額攻媿題云
但見雲生谷初無石似巖得名非舊觀買地作精藍境
勝環修竹門深擁翠杉禪林自佳處莫問後三三

佛巖禪寺縣南七十里唐天復初明禪師置宋寶元初
請額名崇梵後改今額

明慧禪寺縣東南七十里唐乾寧初置名保安宋治平

初改今額

惠寂律寺縣東南七十里晉開運中置名蘆浦宋治平

初改今額

慈濟寺縣東一百三十里宋治平初置

資聖禪寺縣東南六十里唐天順初置名資福宋治平

初改今額

本覺禪寺縣東南一百二十里周顯德間居民宋可規
耕地得片石上鐫七佛因建彌勒庵宋治平初改立為

寺

宣化律寺縣南九十里宋嘉定中里人柯仲諭始建庵
端平初改立寺請因武康縣廢寺舊額名宣化

寂照寺縣東南九十里梁貞明中置名保安宋治平初
改今額

興善寺縣南五十里唐天順初置名保安宋治平初改
今額

延恩院縣南三十里宋端平中僧文最置名普濟庵端

平中改今額

顯教律院縣南五十里宋開禧中伍氏建庵治平中改今額

靈峯禪寺縣南四十里周廣順初全禪師置名保安宋治平初改今額

淨居禪寺縣南二十里唐乾寧初置名龍明宋治平初改今額舒亶題詩云老厭冠蓋場萬事不掛耳時與林間人靜話無生理却聞錢長官只飲淨居水使我夜不

眠燈花亦懽喜

淨巖院縣南三十里漢乾祐初置名練盆宋治平初改
今額

泗州律寺縣南三十里唐清泰中有石佛因水自山流
下僧清立因創精舍後改今額

回向崇法寺縣西一十五里宋建隆初僧義朋紹宗置
名回向治平初改崇法

永寧教寺縣西四十里晉天福中僧鑑瑩置名明波宋

治平初改今額

妙勝禪寺縣西三十里唐清泰中置名永安宋治平初改今額鄭佃為之記曰法常弊於有而法非有則不立是故道之應世也以有為法而以無為用猶云一身也四體具則為成人而所以為人者非四體之任也夫聲緣於耳聞者非耳也色緣於目而見者非目也苟廢耳目而求聲色之辨則何所從而受之哉故以道觀法則內之耳目異處也以道

觀用則外之聲色同我也。内外有辨，故事之所以顯有無相生，故理之所以微。此道之所以先天地而不生，後萬物而不滅也。故為之宮室，以致其恭；為之像塑，以申其信；而又為之言說章句，以道其所歸。此法之所以自立，而衆之所可知也。至於有相而不可以形求，有言而不可以情解，超然自得，而天地萬物莫之能偶。此則智之所不及，而用之所自成也。明州定海縣有禪院，名妙勝，距州城三十里，瀕海之上，環水之中，居處庠陋而有

風濤漂注之患五代清泰中居人姚綰始以其地易而新之遂能避其患而衆安以處也其徒以籍相傳房居而族食凡百有四十餘年而院之存者無幾矣熙寧五年其徒以力不能勝而爭訟以起於是衆列狀以告於州願以為十方住持州下其狀於僧司使集衆以舉所知而衆皆以淡交者應州凡兩上其狀而始獲請淡交居之數年而四方之人始知有妙勝矣信慕祈嚮持金帛而至者蓋迹相接於路而以後為愧於是為之復新

昔之故陋今煥乎其有文矣昔之庠隘今廓乎其有容矣又因其院之隙以建轉輪寶藏其費累數百萬皆不煩於求而自應用工始畢而其徒有訟於州願復得故處州以訊於縣縣力爭之而後已今既安且久矣交公於是日與其衆談無上之法轉無礙之輪以蒙利於衆生此衆之所願記而余之所以告於人者也若夫究竟寂滅而不住於法萬法現前而當體為用說無所說行無所行而有無內外不可以係而處之此則智之所不

及而亦非余之所能言也元豐三年三月望日記羅適
重修記曰元祐七年冬予受命提點二浙刑獄事明年
夏出按明州之定海因之澥浦經度創鎮舟過清泉有
梵刹焉枕河臨道竹深而林蔭氣象灑然清與神會就
之以避炎燄時長老智榮師喜我之來芬我以香息我
以牀睡足環視物幽景涼觀其院之揭名曰妙勝智榮
師言五代時姚綰捨地建之初號永安大宋英宗皇帝
登極以治平改元乃新今額熙寧五年主僧元旦聞於

州願作十方州致廣惠首座淡交開堂始昌禪席淡交
住廣惠以智榮師繼之予過時智榮師造釋迦殿新堂
厨廊廡其功將成予已深嘉師能以禪人興教事起人
之信也明年師又使檀越嚴恕持書乞記且云以元祐
八年冬經始之至紹聖二年秋工告畢凡為屋一百五
十楹佛像七身粉繪莊嚴華而不侈嗚呼天下為僧者
多勞人以逸已蠱我正法智榮師能了自性不為已勞
人惟張大佛事使四方衲衣緇侶得以安處乎般若之

場晨兮升堂夜兮入室破迷祛惑掃空了知如來正法
眼藏與虛空等又能使一方白衣俗士信佛有大法門
可以出生死滅罪業各植大善根入我佛境師之所存
不其偉哉予嘗怪世之學禪者自藥山不許人看經之
後妄生疑情不知藥山為人破執欲人言下一決而悟
由不二法門直入無等等正覺反以口耳所聞縱橫辨
捷自謂見性棄經破律蕩無所守譬如操舟之人不信
施楫流浪江海安能到彼岸耶又聞之藥山嘗自看經

或有問者藥山云遮眼此善忘其指者也如來云以筏喻者法尚應捨而況非法吾知藥山真看經者也師為我謝學者藥山古佛豈欺後世哉勉之紹聖三年四月八日記

息雲律寺縣西北六十里宋治平間僧法志置崇寧初改今額

正覺教寺縣西北六十四里周廣順初僧清肅置名回峯宋治平中改額寺有清風軒邑尉蔡覲詩云

海風拍枕燈初暗山雨打牕人正寒料得此軒秋更好
怒濤推月上闌干文康公王曙咸平中以著作佐郎宰
邑詩云山勢欲壓海禪局向此開魚龍腥不到日月影
先來樹色纔擎出鐘聲浪答回何期隨吏役暫得拂塵
埃

伏龍廣福律寺縣西八十里唐咸通初鑒諸禪師置剌
史柳公武請今額山有海眼泉冬夏常溫宋邑宰朱景
獻遊山題詩云凌雲峻嶺隔凡塵嶺外湖天別是春一

千丈巖人已往五百年事跡徒陳自傳道貌今無垢
不脫禪衣句尚新信是飛仙游戲處何須雲外望三
神德祐初黃公震詩云壯哉天造伏龍山獨壓溟波
浩蕩間百怪鯨鯢俱帖息半天風雨共高閒盈眸縹
緲三神境跬步巉巖九豹關只恐此龍難久伏雲雷
天色正班班

永福院縣西三十里僧清友置宋嘉定中請杭州仁和
縣廢院額名永福

覺海教寺縣南一十三里唐會昌初置名清海宋大中祥符初改今額

洞山教寺縣西北八十里唐開平初置宋祥符請額曰幽棲洞山乃將軍山洞也

覺度寺縣西六十里宋寶祐初置松林庵至元十五年改今額

慈溪縣

普濟教寺縣東北一里吳赤烏二年太子太傅都鄉侯

闕澤書堂後捨為寺唐大中初縣令李楚臣因闕澤字
德潤故以名寺乾符中勅賜應天德潤宋大中祥符初
改今額寺之東岡有松如龍有石如虎元豐中縣令盛
次仲題詩云一松偃蹇蒼龍蟠一石巉巖怒虎踞我來
題作龍虎軒祇恐風雲捲將去因以龍虎名軒朱翌詠
古松詩云三國名臣宅千楹釋子宮但求除橘籍不見
老松公懷抱凌雲上規模偃盖同須防雷雨際恐見化
為龍

補陀教寺縣東一十里唐大中間建舊名大中觀音院
治平初改額

精進院在縣南三十里唐廣明初賜額保國宋治平初
改今額

白龍慈化院在縣東五里乾祐間僧師訥築庵修道誦
經有白龍矯首以聽里人唐居惠捨基建寺故號白龍
治平間賜今額

永樂寺在縣西六十里宋景定初置

白巖教寺縣西南三十里宋乾德中建天聖中賜額

陰興寺縣東一十五里舊名雲舍庵係在城表通判建僧大倫改今額仍奉袁氏祠堂

禪餘吉祥寺在縣西南四十里晉天福中置以禪餘山為名宋治平初改今額

赭山清果教寺縣南一十里周顯德間建宋治平初賜今額

寶慶教寺縣東三十里宋端拱初僧宗定建名西資庵開

禧間僧廣清請今額

善慶教寺縣東南一十五里宋淳祐中僧時習建名崇孝開慶初張司法請今額

妙應教寺縣東四十里宋治平間僧悟誣建紹興中請今額

雲溪廣福教寺縣西南三十里唐光化初郡守黃公晟建聖壽院宋紹興中改今額

定林教寺縣東一十五里晉天福初僧全奉建扁曰峯

山天聖中改今額

覺林教寺縣西北四十里唐景福初僧弘之建宋治平初
賜額

雲湖慶安教寺縣西北一十五里周顯德中建宋治平
初賜額

甘露教寺縣西六十里唐開元中湯禪師建名上龍福
山宋治平初改今額

金仙教寺縣西北六十里唐乾符初僧闕闕習建舊名福

林宋治平初改今額

蓮華教寺縣東北十里唐寶曆初僧圓遠等建治平初
賜額

資西接待教院縣北二十里宋寶祐中建

寶嚴教院縣西二里宋景祐間建始號永明嘉定中請
杭州錢塘寶嚴廢寺額中丞舒亶詩云四山烟雨收雙
沼漾晴碧白鳥忽飛來點破簷前色

妙峯教寺縣西南六十里宋紹興間僧可宗建

五峰廣福教寺縣西北三十里唐元和中僧志堅建宋祥符初請額

天台東教寺縣東北一里宋嘉祐初創始名普濟淳熙初賜今額

永明寺縣西南隅唐儀鳳初邑大夫呂珂捨宅為寺元號禪林院宋高宗賜名大寶大中祥符初賜今額

定香教寺縣西六十里唐天復初僧道恩建賜額太平院宋治平初改今額

定慧教院縣西南五十里石晉開運初建賜額支山宋
治平間改今額

金繩教寺縣西北三十里唐清泰間僧法通禪師因華
嚴寺廢基建祥符中賜額

吉祥教寺縣東北一十里宋治平中建

華嚴律院縣東北一里宋端拱初建紹興中賜今額知
餘姚縣陳時舉記曰學佛之徒以戒為本戒行微細
易學難持要先當明律律嚴而密防微杜漸無所

不至僧不明律動輒得咎何暇講他學是故如來
將入涅槃最取教化尤深激切告諸比丘曰於我
滅後當尊重珍敬波羅提蜜多若佛弟子克遵佛
訓不犯律儀堅持禁戒禪定智慧自然發生則與
如來住世無異也受人天供養作濟世津梁夫復
何嫌宗暉律師久從靈芝游傳南山教戒行高潔道業
純備真佛弟子為此方所欽敬久矣明州慈溪縣有東
西二巨刹東曰普濟寺寺之西南隅即華嚴院也院自

更十方以來屢經住持皆不克振基址湫隘室屋卑冗
僅容百指歲久不葺頽毀殆盡偷安苟且之人不復能
主於是邑父老士庶咸以律師之善狀告於有司俾其
尸之師不獲辭既至朝夕重習寒暑不懈慨然念敝陋
之甚不足以嚴奉香火安處徒衆始銳意更張作是願
已衆信鄉合欣然效力乃闢土宏基剷除舊迹鼎新大
厦設殿於中以尊大士像建堂於前後演毗尼法僧房
廊廡次第成就種種莊嚴之具無不辦集四方從學之

徒幾百人往來雲水至者如歸師與徒弟甘苦一體諷
懺呪無頃刻怠惰邑人愈加歸向凡有疾病困苦無遠
近貴賤皆投依焉而師誠意專致以故而祈禱無不獲
此佛法久住之像而是院之興固未易量噫今之高堂
邃宇貌像嚴飾為邑人祈福之地者向朽敝之餘也今
之芳池綠水花木映照為衲子游息之所者向糞牆之
基也苟非其人道不虛行雖物之廢興固自有時然實
本於人事耳儻非暉師戒律精誠有以動人其能建立

如是耶師以宣和庚子住持即其年具造經營積累建
炎庚戌始得周備求文章於予以紀歲月予與師為里
社之舊熟知其人因書所見之實以勒諸石本院素無
莊土邦人大檀越林暉迪功施田五十畝以為倡師言
自是常住必續有喜捨者當別具記云紹興壬子十月
二十日記

佛跡律寺縣東三十里唐天寶中僧惟實建

鳳巖律寺縣西三十五里宋紹興間僧宗曉建

三峯資壽律寺縣西南六十里唐咸通間虞世南建名聖壽宋景定初改今額

福源律寺縣西三十五里至元燬中丞舒亶題云寺占靈龜背山橫小嶼頭一橋雲借路雙沼月分秋竹影搖虛室松烟著曉樓殘鐘誰共聽寒籟更颼颼

證心律寺縣西四十里唐天福中僧道珍建請今額

蘆山普光律寺縣西南二十五里唐清泰間建治平初賜額

香山智度禪寺縣東三十里唐天寶中僧惟實結庵廣
德初建寺大歷中請額

東臯福昌禪寺縣東南二里宋淳祐中僧智恭建咸淳
中賜額

五磊普濟禪寺縣西北四十里唐文德中僧令願禪師
建舊名靈山大中祥符改今額中丞舒亶詩云五磊
峯高筆挿天長松合抱幾千年塵氛洒落非人世風
露清明近月邊枕上數聲敲夜磬山前百畝起春田

我來欲卧蒼苔色不著藍輿兩兩肩

定水教忠報德禪寺縣西北三十里唐乾元間僧一華
建名清泉宋嘉熙初袁樞密增田建寺請於朝改賜今
額

石門饒益禪院縣西南五十里唐景福初進禪師建扁
曰石門宋治平初賜今額

西峰度門禪院縣西北六十里唐元和間常禪師建名
曰西峯後改廣明宋治平初改今額

永壽尼寺縣西北一十餘里宋紹興中僧惠真無念建
咸淳中燬後重建

湖田經堂縣東二十里宋開慶初余德齋置
寶蓮經堂縣西五十里至元中王恩恭置

正念庵縣西一十五里宋淳祐中僧法印建

溪隱庵縣東二十里至元中僧如良建

福源精舍縣東五里淳祐十年朝奉郎知溧水縣李以
申妻朱氏所建婦茹氏增創之尚書可齋袁商為記孫

印傳妻胡氏復置田二頃四十畝命僧有心主領翰林侍講學士袁桶為記

象山縣

等慈禪寺縣西北一里舊名鳳躍宋元嘉初置治平初改今額吳郡方預釋迦殿記曰三代而下自天子達於庶人為之宮室莫不有制卑踰尊賤敵貴則其制亂是故聖人作為法度雖毫毛纖悉之餘未嘗不叮嚀規戒盡君臣上下之分使尊而貴者

不過其侈卑且賤者亦不甚陋為萬世之定法也自爾
勑營百出事非經見窮巧極智矧生於後人則學者未
聞固不敢輕議余以此事牽出鄞江因次象山縣有浮
屠氏慶恩者忽見余而言曰負縣之北隅有我佛所居
曰等慈慶恩實僧院也且院之名今天子詔以賜之舊
亦以鳳躍為額甲乙繼守四百有餘歲咨嗟前人蔽於
自奉以法堂方丈香積僧室逸居飽食為事獨大殿歷
年踰久棟楹梁桷橈折朽腐飄風暴雨無以處我佛某

方遠慕覺道繼唱真乘不忍坐見隳敝發無量大慈悲
心一日率住持人友宗訪縣人林奉元實此民巨富之
又豪者同力勸緣廣募檀信迺得錢百萬涓日命工雨
錘霜斤鼎新革故飛甍畫棟蟬聯綺錯仰望俯視丹雘
浮動乃以釋迦佛坐之於中文殊普賢迦葉阿難四菩
薩侍焉護法二神立於其外復以十八大羅漢環拱旁
列就其佛之尊者名之曰釋迦殿遠近嚮慕源源如歸
嗚呼非我佛法廣大妙道通達則何能集是壯觀哉以

元嘉八年十月始作治平二年十一月休工某能力為如是願丐之以書本末將激其不能為者余應之曰師之言詳矣使余雖信後之營向之巧而復為之說亦無以過之也況余所不敢輕議者耶治平二年歲次乙巳十二月己丑朔二十五日庚戌記

智門禪寺縣西二十五里舊名保安周顯德中置宋治平初改今額崇寧二十年八月七日象山縣令金陵徐敏求為之記曰西方仙聖立開導引掖之方俾有生就

善避惡與吾聖人之道初無以異若其所謂無所
住而生其心夫本覺妙明者雖百姓日用而不知
至於一切不得已而寓之於迹俾常情卓見聞之
亦足以革非心而弭貪欲故以清淨恬虛為禪定
以謙退柔遜為忍辱則知心爭可得而息也以菲
薄勤儉為修行以窮達壽夭為因果則賤陋或可
得而安也以隨所作業回復償報為地獄之說則
為不善於幽隱之中而幸免名刑者或知畏憚也於

善俗之政教實亦有助聖人因俗之善而導之有所不
禁焉及其弊滋甚則繒臺慢闕銀池玉樹以為莊嚴當
然考鼓鳴螺晝夜梵唄斷指灼體膚以為依歸當然禱
福祈年忘本附末紛紛愚衆波蕩以從是學佛蔽蒙之
徒以迷識佐其高妄相夸脅而倡其風之過也韓退之
于唐喟然引聖力爭四海之域撥衰反正不使汨為怪
焉者以為已則學佛之徒不可不慎苟非其人必肆為
慢靡鬼瑣之行以害聖治為疑政亂政之罪人縣之西

有佛院曰智門距縣三十里最為佳處先是院僧相繼主之姑以前後為序不復簡汰殿宇蕪穢弗除弗治其依倚禍福而恣欺惑者蓋不可道也崇寧元年六月衆請於有司願更為十方禪居太守兵部陸公傳命廣惠首座僧曇惠住持慧公操孤高能其事曾不閱月倏然革圯陋為梵釋龍天之宮方袍至者修潔盡敬人游其地善心以生學佛之徒如此蓋亦無負土木華構不為虛設矣院建於周之顯德治平中賜名為智門迨今始

輪奐完備禪刹因知地廢與顯固自有時也其形勢
雄快足以登臨耳目所寓無非至教海雲合散空色兩
無潮浪去來愛緣欲淨泉聲漱玉與地籟倡和若出廣
長舌相宣微妙言則意此地又必有神物護持須其人
而後興焉余宿官於此方推行朝廷善令仁政使海濱
之人漸上道化而慧公頗能知佛之本心與衆為善蠲
治塔廟恥此為流輩之欺惑良異夫迷不自識者亦可
嘉矣懇余施一言以為記故樂為之書

寶梵教寺縣東北一百三十步舊名東禪宋建隆初置
治平初改今額苾芻法明為之記曰大夏距天竺國不
知其幾千萬里有能仁民之教蓋出於淨飯之後當
周昭王二年四歲而生焉大聖將利王於天下忽
地動泉溢虹光上貫紫微王命史占之剖石南郊
用紀其事生十九年父王以嗣翌之儲鍾愛甚篤
禁何負出之座志堅不可奪遂踰成雪山修道德著行
滿於菩提樹下成等正覺三轉法輪度人無數機新既

盡將入涅槃顧謂其徒曰吾滅後一千年聲教當留於
四方於是阿難多聞第一與諸弟子懼微言將絕於畢
鉢羅窟中結集法藏凡住世四十有九年所說之法若
水傳器將大小諸部不可備舉盛行其土至感明帝夜
夢金像飛行殿廷因遣使往西域求之月氏遇摩騰竺
法蘭二大士以白氍繒其像貝多葉繕其書至止洛京
首命翻譯印四十二章經為釋教來東之始也乃度僧
叔白馬寺以奉之原其教大率以因果為宗近則使人

遷善遠罪終則使之革凡成聖大有益於教化故世為
儒道釋若鼎之足焉歷魏晉隋唐又遷千有餘載中間
或隆或替皆係於時君世主其道未嘗為之增損巨唐高
僧玄奘義盛者嘗親往天竺備歷寒暑得經律論合前
後所譯約五千餘卷梁朝傅大士乃補處慈氏方以其
書覆以寶殿架以車軸使人推之此亦流通法寶無窮
之意自爾檀信有所祈禱至於事迫懇投如谷答響或
者竊疑之曰吾觀琅函玉軸而赤者是紙黑者是墨分

別者是業識與夫施財推利之人而手未嘗捧其卷目
未嘗關其書又不知其中所說何法祇一舉心祈嚮便
能感格神物易危為安此係何道而致之然殊不知如
來為一切衆生故於娑婆世界無一芥子許不是舍身
命處且以丈尺之地鋪以芥子縱功力筭計尚莫能知
況娑婆如是之廣其積功累德宜乎不待發一言而千
里應之此且以一代施之為言若其以法界身隨機逗
教則塵塵刹刹殿推是藏聞所出音聲與親聞如來所

說一大藏教無以異也而况手持目闕游心其間者哉
荆溪且一句築神咸資彼岸思惟修習永證菩提則前
所謂遷善遠罪革凡成聖豈虛言邪寶梵院者在縣之
東北隅去城市一牛吼地治平中始易今額業以十方
講觀住持政和間猊座久虛衆舉真懿大師德臻胡氏
子世為邑之大族妙齡披緇度世延慶三十年稟法智
大師天台教觀象欽仰既來適丁百廢莫能支梧一日
其父允和語之曰邑中未有輪藏為道俗洗心殖福之

地汝能經畫吾當助之於是樂從其說袖疏出謁豪右
後七年而藏成寶殿一新華龕八面護法神龍從地捧
之而出菩提天仙光明輝映若帝網珠互相涉入其徒
了宗如雅可立同往烏墩鎮募緣得經五百函以實之
興作於建炎丁未落成於紹興甲寅總費錢萬有餘貫
既成臻公遂告老西堂未二十年而主人幾易第恐日
遷月化後之人不知創始之本未乃過謂僕曰此藏未
有記公能以文字治增上勝緣乎僕曰昔韓梓材唐之

名儒也嘗為清泉寺作輪藏記其間所載太和中率天下佛祠逾三萬其能置大藏者不過十百然以唐較宋朝其增置佛祠不啻數倍而能置大藏者又何止於十百而已哉顧當時建立之人求其記者皆一時鉅公碩儒托以文章翰墨照耀後人欲其取重於天下矣而公獨以一林下無聞之人求為之記得非以僕蕪而為誚

焉

缺

延壽寺縣北七里舊名龍壽漢乾祐初置治平初改今

額

常樂禪寺縣東北三十里唐乾寧中刺史黃晟建宋乾德初改寶慶額治平初改今額廬江縣主簿樓郁記曰嘉祐七年寶祐縣之主僧死邑令陳居玠易為十方之院命金峩首座僧道相居之院在邑之東北一舍之地即明州刺史黃君之所建也寶慶之號肇於乾德之初至治平改元之明年乃賜常樂之額黃君諱晟仕吳越國王自君之歿百有餘年其徒相傳不為少矣知一身

之利而忘其所以利於衆人相師之到而顏垣斷棟負土而立者相忘矣相師曰吾志在乎山水之間得此固足樂矣乃與同參文應及弟子則之相與經營破私為公撤舊增新又天童僧冲太者植松杉二萬餘本不踰年遂為勝絕之地邑之人知相師不私於其身而有利於衆人咸信而歸之故黃宗浦孫常憫吳允熙陳允恭等為之檀施宗浦乃刺史之裔孫常憫先跡之墜遺有意而興起之既得相師修學去來見在一切佛回向在

它化自在天殿曰摩尼寶時金剛藏說過去未來見在
諸佛智地今此寶殿妙好嚴特名字何等當說何法願
為敷演居士告言佛子智身寥廓徧周十方法界圓融
終始無際是以如來正覺初成九天同屆普光一集十
處咸登今古無差舊新一念故不離果德大澤普應十
方而為一時一會本無去來心汝今者自心之力念念
之中信之此身與十方諸佛齊成正覺轉正法輪則普
光即殿殿即普光既信此心住於佛住法界虛空廣大

無二則妙勝即殿殿即妙勝學三世佛常行萬行利益
衆生不可思議則寶莊嚴即殿殿即寶莊嚴發廣大願
充滿法界救護衆生慧智自在則妙寶即殿殿即妙寶
住菩薩住入佛智地究竟修行成最上道則摩尼寶即
殿殿即摩尼寶如是言之則帝網重重鑑象相入不動
智佛常坐道場諸大菩薩遊戲三昧則此殿者當何名
為汝其諦觀作正思惟普光法堂正在此處時諸大衆
聞居士言得未曾有咸作是言善哉居士快說法要我

等今者信解受持願書并之作將來眼居士曰不亦善乎宣和六年十一月望日

玉泉教院縣東北三十里宋乾德初置熙寧初加賜壽聖紹興間改今額

普明律寺縣西南一十五里梁天監初置名湧泉宋治平初改今額御史臺檢法官王庭秀方丈記曰普明距縣西南一十五里而近其地得於兩山之間背岡面阜東西纔踰里許而林巒相屬山光競翠幽泉通響

含溪空谷岫幌雲關一別區也院興於梁天監中號湧泉至治平初篆賜額普明歷歲滋久四合之宇僅備甲乙繼居因陋就寡寢以隳蔽夫以釋子之宮絕在塵外而境不時興良有待也僧道澄行業精潔睿解過人其住持之明年慨然嘆曰昔人之創室展脉虬角之居現相賀跋之舍神闢林麓而運梗楠天除沙礫而備安居道之所繫誠之所至雖天地鬼神猶不違時刻之相況吾徒久有此居衲子曰視山所容猶有餘地闕者而興

之當有樂成吾事者多矣於是有僧道殊法定率衆先
中欽承師古乃鑿山而建方丈之室施者四集鳩工於
春迄冬而成巍特亢爽屹出衆薨之上異時榛莽蒼翳
嵒壁峭嶢若非人力所易平斲而迺今修梁峻廡翠牖
碧堦虛坦明豁出人意外是可為普明松桂榮而雲壑
賀也一日集其徒於上告之曰裏區勝境千佛之居五
臺北峙廬阜南矗穹窿峻極穹居疊嶂懷靈抱異仙聖
所宅金碧交照梵唄相聞而吾之文殊以光相現於二

山金橋亘空聖燈耀夜祥雲綿延圓輝閃爍真異境也汝今諦觀佛身廣大充滿法界於衆生前無所不現則丈殊遊於无量千萬億阿僧祇國所有光相在在處處可得而覩惟此丈室非大非小不侈不陋有若毗耶離城摩詰所居汝等當正思惟安住身心丈殊大士將以獅子高廣之座來至此處現大神通以不可思議微妙法門開示於汝足雖不登五臺不履廬阜而丈殊光相於汝等前元時不現則吾此室所作佛事與彼諸方

等无有異豈不快哉豈不幸哉他日妙高居士道過之
證前因曰茲山寂寥久矣近勦此室雖曰幽隘而嘗安
語其徒者如是矣願識之以示後來可乎余聞其言而
善之因命筆而與之記建炎改元六月十六日朝散郎
御史臺檢法官賜緋魚袋王庭秀譔

蓬萊山廣福寺縣西南三十里舊名蓬萊院漢乾祐初
置熙寧初改壽聖紹興間改今額權婺州永康縣事劉
渭記曰四明東海之上有象山象山境之西南有佛刹

焉五代之梁創之以蓬萊之額是為龍德二年我朝之宋錫之以圖書之文是為太平興國四年准勅聽以甲乙住持者天聖三年也蒙恩易以壽聖之名者熙寧二年也是院隱然介衆山之中也雖無崇巖巨壑盤亘千里高挿雲天雄壓地軸而佳巖蒼岫周遭映帶卑相附遠相揖亭然起崢然止而朝陽暮靄露花霜竹出沒於空曠有無之間恍然若圖畫中見也太僕卿直秘閣林公旦昔宰是

邑尤意愛之且嘆基址頽圯榛棘出人庠堂隘宇
上破而旁穿殆不足以擅斯景而奄有也因命釋永淨
主院事焉蓋永淨者余聞之操行謹潔智敏捷而謀多
又卒之以不私於是登高而望默畫於方寸輦糞壤焚
榴翳却立而視為之瓜分棋布地形之崇卑欄宇之閑
狹瞭然在目矣迺始即其舊而新之規其小而廣之
三門峙列兩廡翼張閱經有堂獻供有厨澡身有室休
賓有館輪焉奐焉一切鼎新有若鬼神陰來相之獨所

謂佛殿闕焉居者無以寓歸依之誠來者無以聳瞻仰之禮適得邑之信向者相與出力而巍巍之殿屹立矣復建寶藏以居殿之中金函玉軸層見疊出所謂妙典秘偈悉募僧行筆之蓋其徒寶山倡其初義肱膺其終積之數年而五千四十八卷之文燦然完成矣既又闢田三百畝以贍二時之供羞植松十萬本以助衆山之森立亦其徒慧初義琛與夫郡豪吳君驥有力焉竊嘗謂事以速而不達以久而有成天下之理也是院由五

代以迄於今日寥寥二百餘年乃始修壞而成補罅而完易隘而曠潰質而文工告畢事告成豈一朝一夕為哉又况永淨與其徒數人協心聯力卒之以不私如是宜其有成也若夫昇猊座而獅子哮吼震雷鼓而法雨沾濡聞之者聲上上之真機飲之者味如如之妙旨此又有待於來者焉崇寧元年三月一日記

護境寺縣東北二十里建隆初置熙寧初加壽聖紹興間改今額

保寧寺縣西南二十里舊名保安周顯德中置宋熙寧
初加壽聖紹興中改今額

瑞龍寺縣東南十五里宋乾德中置

新安寺縣西南五十里周廣順中置

任師寺縣西南五十里周廣順中置

陳可復

陳可復定海人其師與真幼歲居杭入禁中精齋醮儀
可復幼疎爽越有林生善役雷恣酒自許有問其法輒

叱去可復晝夜承事伺林嗜酒每鬻衣以奉繇是卒得其術至元九年鄉大旱禱禳莫應有戲之曰陳道士能召雷命至官人將候其不驗以侮辱可復徐行精思集雲雲果合須臾雷電大作雨甚遂召為承應法師見於世祖皇帝偉其貌命治足疾可復曰疾深不可除臣有禁架術願試之試良愈復命治風風返却祈雪雪立至從上巡幸幾十年卒京師追封為誠明翊教太極真人

在城道觀

玄妙觀在東北隅唐天寶二年詔天下皆置紫極宮以祠老子梁開平二年易為真聖觀宋祥符二年改天慶
紹定元年太守胡榘重建皇朝至元十九年燬至元廿
九年改今額至大二年復火

報恩光孝觀在西北隅唐開元二十六年所置開元宮
也改為崇壽宮宋崇寧二年改崇寧萬壽政和元年改
天寧萬壽紹興十三年改今額皇朝至元十九年火重
建至大二年火及山門兩廡而止其殿巋然獨存

靈順宮在西南隅宋開禧中徐侍郎自徽州奉五顯
靈觀以歸捨地建置田以充大德十年大風震屋重
建

報德觀在西北隅宋淳祐七年趙郡王與懽建飲飛廟
在焉皇朝至元十九年火重建

福順觀在西北隅宋寶祐間郡王趙與懽建以奉玄帝
祠皇朝至元二十九年宣尉趙孟傳請今額

文昌宮在西北隅宋咸淳七年道士范介然建崇奉梓

潼真君皇朝至元十八年申請教所以武德文昌為額
西雲大寶宮在西北隅宋淳祐八年道士董真懶建大
寶宮在西門後燬皇朝至元十四年王錫以西雲道院
捨於宮遂合為一

回真道院在西北隅皇朝至元二十三年王惟明捨地
以建

明霞觀在西北隅皇朝至元二十八年道士鄒晉華建
扁曰明霞真館大德六年請今額至大二年燬

紫霞仙觀在西北隅皇朝元貞元年軍千戶張重翔捨地以建

玄真道院在西南隅皇朝大德十年道士蕭真素建今扁曰月湖福地

沖和道院在西北隅皇朝至大二年道士蕭真素置蕭氏屋改為道院

玄玄道庵在西南隅皇朝至大二年玄真道院建至大四年道士張存真建鉢堂以來方外之士

蓬萊觀在縣西廣德湖之望春山先是白龍祠之側有道堂郡守樓公昇生祠紹興三年請象山廢觀為額攻媿樓公作記云老與佛之學行於世尚矣未知孰為輕重然以吾鄉一境計之僧籍至八千人而道流不能以百其居財十數而佛廬至不可數何耶蓋嘗聞之歐陽公矣大畧以為佛能箝人情而鼓以禍福人之趨者衆而熾老氏獨好言清淨靈仙之術其事冥深不可質究故凡佛氏之動

搖興作為力甚易而道家非遭人主之好尚不能獨興
且曰其間能自力而不廢者豈不賢於其徒者哉明之
四山去郡皆三十餘里西有湖千頃一山穹然秀出此
為最近者名曰望春舊有靈波廟以祠白龍政宣間有
陳孜者始崇以殿辟道院於東俾道士馮立權奉香火
祖父少師典鄉邦因湖之淤請於朝而田之歲得穀亡
慮四十萬斛父老以為德生立祠於其中又得道士何
思遠居之於是觀宇益興廊廡畧備思遠澄心鍊氣得

黃老之真風驅役鬼物靈迹有不可掩者嘗之京師有
運船數百千艘欲絕淮為潮不登為作法於其壩未幾
潮溢歡聲如雷悉賴以濟發運使以聞勅差明州管內
副道正盜發清谿旁郡山谷間多響應者祖父大飭守
備郡以無恐思遠亦有陰助石記存焉紹興癸卯太守
莫公將命拜章禱雨而驗奏移象山蓬萊觀廢額手書
扁榜以寵異之其後主者竭力以增益前功今知觀吳
若納繼胡志清之後里之巨室厲氏兄弟相與出力興

造又得咎氏創岱嶽行祠於山麓遂為一方勝處由歐陽公之言觀之諸君可謂能自力而賢於其徒者矣某自念生晚不逮事祖父嘗拜祠下冠佩儼然幼年及識何君猶記其道貌能歷歷道祖父時事使人起敬吳嗣法於何為孫行謹行乃祖之法以大其居是為能負荷者故與之遊一日來請曰觀之興才六十餘年懼無以傳遠久願記之應曰傳之久不久正不在記而況此骭骹之文乎世之棟宇有傾民力為之欲為無窮之計而

驟起亟廢幾不能以一瞬山顛水涯結茅累甍或遂化為殊庭自前古以至今日者非一也子以為今之琳宮藥館據名山洞府之勝霞冠星襦搖曳其間者皆固然耶其創始之初亦若是而已又未必能如子之居之壯其寢致雄盛者雖曰有數亦存乎人爾揆之世法又何止棟宇也哉今蓬萊之興或作於前或繼於後以躋登茲歸語子之徒儻能念其艱勤而增葺之則真可以无窮矣吳曰正欲記此以示來者遂為之書

壽聖觀阿育王山前宋大觀中道士梁守清始建東嶽行宮嘉泰元年道士胡抱一請紹興府餘姚縣廣福廢觀改今額

雲它觀濤山堰旁嘉定十二年賜額遺德廟屬焉

顯忠旌德觀清修悟真觀太清悟空成道宮並在大慈山宋丞相史公母齊越國夫人葬於山中建為功德所紫清觀在縣西三里豐清敏故園也皇朝至元二十一年道士范希和建

玉皇觀縣東十里皇朝元貞二年道士胡道甫建

甬東助順宮縣東二里皇朝至元十九年道士吳葆儔建

紫虛觀縣東五里皇朝至元十九年道士樓坦建

至德觀縣東二十五里皇朝至元十八年道士程德蓋建

昌國州

道隆觀在州之南本東嶽祠宣和二年守臣樓昇請今

額建炎間金人入境以斧斫殿楹為流血金人乃去境
賴以安殿曰金闕寥陽門曰蓬萊福地皇朝至元二十
六年其徒爭主道士陳可與祝髮為僧遂改為寺至大
四年道士蔣明善求直於有司延祐二年復越王題臨
江仙詞云試凭闌干春欲暮桃花點點胭脂故山凝望
水雲迷數堆蒼玉髻千頃碧琉璃我本清都閒散客蓬
萊未是幽奇明朝歸去鶴齊飛三山乘縹緲海運到天
池

道隆觀記

貫雲石作

聖朝元仁大德撫四方興三教各有恒致以不失所為
上至元間河西祝髮氏楊永福總攝江南僧政而其玩
服子女飲食起居悉蠶諸僧僧罄而越取凡唐宋所額
宮觀稍似豐厚者以已力經為佛寺梵其士金其像火
其額不下千百所嘗又羅煅入罪僂道士凡三四人由
是此流背玄門趨金教者甚衆永福坐法後前所額宮
觀歸其教者纔一二耳余嘗觀所在諸既歸而復爭者

蓋不得其官既安而不葺者蓋不得其所不葺者乃
人鄙所復爭者乃官貪之故也延祐第四禩春三月余
游海上艤舟昌國之頃搜奇訪古惟以進士倅是郡干
文傳偕余游此環觀所謂聖母池者再復登後之翁
山周而視之雲水互碧明晦交錯唯意在而身亡也壯
哉觀余又不舍而勤顧似非老氏室亦非浮屠嘗試問
之有道士蔣君明善起而應曰始自汴宋哲宗元符三
年前祠東嶽聖帝後以道院奉朝昏徽宗宣和初是邦

守樓異請額於朝賜道隆觀皇朝至元二十又六年道士陳可尚附楊炎斷髮緇衣亦歸佛氏遂以觀為寺至大四年春明善愬之有司天道好還復仍其舊扶顛補弊規制粗立今先生之來可謂大遭也願為文記之余求郡誌按之然就官僚詢之然即耆宿審之然嗚呼變其人而道存取其物而理在昔也彼以人勝吾以物奪非奪吾之吾也今也吾以人還彼以物棄亦非棄彼之彼也老子貴無為尚清淨吾與彼其有辨邪其無辨邪

且吾聞是州浮屠之居溢三十老氏僅一區使胥而為
浮屠則老氏之教不幾息明善清修強敏能事其事其
不葺固非吾憂後之官守能不貪則能使無煩其不爭
審矣自今焚修不懈祝聖壽之無疆明善勉之哉

文昌宮在州東學之側宋咸淳間州人創建以祠梓潼
君皇朝至元二十六年因道隆廢為寺遂以三清像寓
焉

真武宮在州治之南

岱山東嶽行宮宋宣和間道者徐淨超募緣以建田數畝而已

祠山行宮附祖印寺之右

蓬萊集仙道院在蓬萊鄉之朐山皇朝至元十八年鄉人李心道創立以為祈祝之地

奉化州

虛白觀州東北四里唐昭宗時賜額觀有三清像制度精巧老君像袖中有一蛇長數尺潔白如雪隱現不常

洞真觀州東北四里皇朝至元二十四年前漕貢士盧震龍棄儒學道創立請額於教所而震龍為開山其宗盧道欽等甲乙住持其後道欽鬻田質業圯壞棟宇皇慶二年本州議欲興復而天師以盧乃虛白觀王師回弟子以其田入虛白合而為一焉

開元宮州南五十里宋開慶元年郡守丞相吳公潛請
令額

元真觀州西北二十里宋嘉定十一年觀丈趙公因建

墳創立初營殿址之日有紫芝四本生於墓山因名紫芝山

玉清葆僊道院州東南五十里宋德祐元年戴行恕建梓潼文昌宮州東北四里宋景定二年故漕貢士盧震龍捐資買田築宮以奉梓潼帝君之像

慕真觀州東三十里皇朝大德六年七年請額於教所
慈溪縣

清道觀縣東南三里唐天寶八年建後廢宋紹興三十

年道士葉景虛重建又於其右建東嶽祠尚書樓鑰扁其闕曰列仙游館皇朝至元十七年火重建

崇壽宮縣西北五十里屬鳴鶴鄉定海縣東海王廟道士嘗請崇壽為其觀額此宮遂改天寧觀又改天寧萬壽觀後東海王廟改為淵德觀紹興元年復其舊額

大隱山至道宮縣西南四十里下有龍潭唐天寶二年遣使投金龍禱雨泛出黑漆木板有金書大寶永昌四字雨隨應乃賜潭名永昌建觀潭上名大寶地卑濕宋

祥符間一夕疾風大雨拔木發屋觀宇忽運於溪南高
爽之地人號神運殿治平二年賜今額世傳葛仙翁謝
康樂修煉之所宮側有藥白石臺存焉寶慶元年道士
董成真聞於朝聿新之

定海縣

淵德觀縣東北五里元豐元年建淵聖廣德王廟命道
士主之崇寧三年建詔天下建天寧萬壽觀以本州崇
壽宮改置四年請其額寘本廟宣和五年改今額建炎

四年火紹興二年重建寶慶二年徙於茲

旌信朝元宮縣東北五里即招寶山下東嶽行宮宋紹興八年道士李知孟建皇朝大德六年教所請今額

陳山行宮縣南五里宋道士高國明所建奉東嶽香火東嶽行宮縣南七十五里海晏之穿山皇朝至大三年道士劉尚賢建

澥浦行宮縣西北六十里宋乾道六年道士錢時晦建祠東嶽

蓬山道院縣西北七十五里據山瞰海地處大蓬山之麓皇朝至元二十一年淵德觀道士裘應聲創建

象山縣

棲霞觀在縣西南二百五十步蓬萊山之下舊名蓬萊觀秦徐福梁陶弘景皆隱迹於此隋大業元年廢唐天寶十三年台州刺史袁仲宣復置大中元年令楊弘正告於明州刺史李敬方重修宋治平二年改今額淳熙末遷於山之西嘉定十三年道士張大原於舊址重建

大瀛海道院記

外際乎天內包乎地三旁無垠而下無底者大瀛海也
非神融混冥智周寥廓能納六合於方寸未易與語此
而有客授予大瀛海之圖為之瞿然以驚謂客曰此惡
可圖也而孰為為之哉展而視之則荒厓斥澤之間浮
沙淺土之上一勺之沮洳一撮之埆瘠夫豈沖和清淑
明秀靈異之所鍾乃或堂而構焉以為栖霞餐露之館
而冒之以是名也又為之喟然以吁授圖者曰達人奚

索之之深耶鄞之東南百里達於海舟行八十里曰象山有縣縣之東二十里曰爵溪潮汐齧衝賈舶絡繹東望日本南走天台世傳神仙安期生之屬所來往也故其民至於今好仙道而其鄉曰遊仙至元癸未鄉之王翁棄妻子改名一真結屋其隈延接方外之友前代善書之人嘗有大瀛海三字購而得之因以為扁大德丁未天台崇道觀道士呂虛夷為縣令禱雨有應王翁一見而莫逆也遂與共處王逝而呂嗣主教者命之世

守方將資衆力大其居又欲資一言久其名也為是手
圖以來蟻之於垤也蝸之於殼也涪蹄之於廣宮大圃
也亦各適其適也而達人何索之之深耶予於是進道
士與語曰予生長海濱請為子竟瀛海之說禹貢叙事
至訖於四海而止訖者地之盡處也海之環於東西南
北相通也而西海北海人所不見何也西北地高或踞
高窺下則見極深之壑如井沈沈然者蓋海去東南地
卑海水旁溢不啻萬有餘里中國之地廣輪方三千里

耳而東連海岸以勾股稽之水之所浸倍於中國之地者二十而羨其間洲島國土不可勝窮若三神山者蓋不知其幾也奚獨蓬萊方丈瀛洲也哉載籍之所不記人迹之所不及而惟長年度世之流形質銷鑠神氣澌凝逍遙飛步乎太空之中者得而至焉之人也雖非曩教庸行而胚間氣秉絕識超越凡庶萬萬也企而慕之者人人而然能幾其彷彿者誰歟名不混世實不離世稊稊營營卒與端奩肖翹之類俱為塵泥其亦可哀也

夫今子出乎四民之外不與遊方之內者為徒詎可但
以大其居久其名之為務哉必有事可也他日朝燕暮
越瞬息八極冷然御風過三神山之頂臨睨舊鄉而一
笑下戲人間自稱回道入非子也耶道士改容曰敬聞
命敬聞命於是乎書以遺之日餘十有二杓貞於天田
延祐第六春也集賢直學士奉議大夫吳澂記

延祐四明志卷十八